

國學基本叢書
彭城集
上

彭城集目錄

卷一

賦十首

卷二

賦五首

卷三

五言古詩六十五首

卷四

五言古詩七十五首

卷五

五言古詩六十首

卷六

五言古詩四十七首

卷七

彭城集目錄

七言古詩五十五首

卷八

七言古詩五十首

卷九

五言律詩八十八首

卷十

五言律詩八十六首

卷十一

五言律詩九十二首

卷十二

五言律詩一百七首

卷十三

七言律詩八十一首

卷十四

七言律詩八十一首

卷十五

七言律詩九十二首

卷十六

五言長律五十九首

卷十七

七言長律十首
五言絕句三十四首

卷十八

七言絕句一百三十六首

卷十九

制誥五十六首

卷二十

制誥五十九首

卷二十一

制誥六十九首

卷二十二

彭城集目錄

制誥六十三首

卷二十三

制誥六十首

卷二十四

奏疏十七首

卷二十五

表二十一首

卷二十六

表二十首

卷二十七

書十一首

卷二十八

啓二十五首

卷二十九

啓二十八首

卷三十

啓二十九首

卷三十一

啓三十三首

卷三十二

記十二首

卷三十三

論七首

卷三十四

序五首

卷三十五

行狀一首

卷三十六

神道碑一首

卷三十七

墓表二首

說一首

行狀二首

墓誌銘六首

卷三十八

墓誌銘六首

卷三十九

墓誌銘八首

卷四十

雜著二十七首

臣等謹案彭城集四十卷。宋劉敞撰。敞字貢父。號公非。與兄敞同登慶歷六年進士第。官至中書舍人。事蹟具宋史本傳。史稱敞未冠通五經。博覽羣書。沈作詰寓簡亦曰。國朝六經之學。自賈文元倡之。而原父兄弟爲最高。司馬光修資治通鑑。自辟所屬。極天下之選。而任史記前後漢書者。敞也。其知兗毫二州。以不能奉行新法。黜監衡州鹽倉。哲宗初起知襄州。入爲秘書少監。錢勰草制。極稱其詞藝。其後以直龍圖閣出知蔡州。孫覺、胡宗愈、蘇軾、范百祿交薦之。言敞博記能文章。政事倅古循吏。身兼數器。守道不回。乃召拜中書舍人。蘇軾草制。稱其能讀典墳邱索之書。習知漢魏晉唐之故。其歿也。曾鞏祭文有曰。彊學博敏。超絕一世。肇自載籍。孔墨百氏。太史所錄。俚聞野記。延及荒外。陰陽鬼神。細大萬殊。一載以身。下至律令。老吏所疑。故事舊章。盈廷不知。有問于子。歸如得師。直貫傍

穿水決矢飛。一時書林衆俊並馳。滿堂賢豪。視子塵揮云云。蓋一時廷評士論。莫不共推。卽朱子于元祐諸人。自洛黨以外。多所不滿。而語錄云。貢父文字。工于摹倣。學公羊儀禮。亦復稱之。豈非放學問博洽。詞章奧雅。有不可遏抑者乎。史載所著諸書。有文集五十卷。五代春秋十五卷。內傳國語二十卷。經史新義七卷。東漢刊誤四卷。詩話二卷。漢官儀三卷。芍藥譜三卷。今所存者。自詩話以外。惟東漢刊誤。散附北監本後漢書中。未見孤行之本。芍藥譜亦僅而不亡。文集則宋史藝文志。文獻通考。俱作六十卷。明文淵閣書目。有彭城集十五冊。不列卷數。今所傳三劉文集。僅有公非集一卷。凡詩四首。文二十三篇。蓋掇拾于散佚之餘。多所闕漏。卽宋文鑑所選者。且不盡載。其他可知。至以劉顏之輔。列名對序。誤屬之敬。舛繆尤屬顯然。殊不足據。今檢永樂大典所載。篇章尙富。蓋卽據彭城集收入。謹掇拾排比。釐爲四十卷。較之原書。所少不過十之一二。與新編其兄敞公是集。鉅製鴻裁。舊觀幾復。在北宋諸家中。可謂超軼二孔。而憑陵兩宋者矣。乾隆四十七年十月恭校上。

總纂官內閣學士臣紀昀

光祿寺卿臣陸錫熊

纂修官翰林院編修臣周永年

彭城集卷一

宋 劉 敞 撰

賦

鴻慶宮三聖殿賦 并序

〔案〕此賦見宋文，與永樂大典原本，互有差訛，今校改。

臣伏見陛下追述祖考，崇奉明祀，新作三聖殿，以昭孝明功於天下。臣以文學中第，太常試官祕書，目覩盛事，不敢以鄙薄自絀，輒作古賦一篇，以歌詠盛德，昔靈光景福之作，世稱其美麗，然其所謂狀大，不出雕刻畫績文彩之煌煌而已。又盛道工人之巧，民力之衆，材木之多，金玉之偉，臣以謂王者有作，則必智者獻其巧，壯者輸其力，山林不敢愛其材，府庫之聚，皆所供億也，是物理之常，不足以夸大。臣愚竊陋之，若夫天命廢興之際，聖王授受之符，非敏智通達，未有能究知其始終者，固難爲寡見淺聞者道也。臣竊大之，是以略所陋而張所大，不敢仰希風人雅頌之列，庶幾有其志云爾。蓋上帝之所以選建明聖，命以天位者，乃所以享德而報功焉，未有德盛於前，功播於後，而其子孫寂寥，千載無聲者也。賢哲所談，六籍之云，德莫著於有虞，功莫隆於五臣，禹平水土，夏姒以家，司徒后稷，是教是食，肇商興周，歷載數百，皋陶大理，五刑以明，於其苗裔，乃興於唐，若夫董淳耀以攸司，奏庶民之鮮食。

焚山烈澤。害服妖息。鳥獸咸若。草木允殖。固伯益之力焉。天報以位。俾秦周繼。於其子孫。誣祖不紹。去火卽水。叛禮尙刑。法以慘急。然猶兼六國。一天下而不知變於初。二世以斃。非天不相朕虞之後。乃其否德。得罪於祖而斷棄也。惟伯益之功未報。是以大命復集於趙氏焉。五代喪德。九土分裂。海水橫流。民用墊溺。鳥獸昌熾。黔首失職。滔滔惑惑。蓋若洪流之未闢。於是太祖乘火而帝。繼益之功。天胙吉土。曰惟商丘。是爲星火大辰之居。亦曰明堂布政之由。出潛離隱。或躍在淵。以有九有。百度正焉。削禍戡亂。出民塗炭。風揮日舒。天地正觀。荆燕吳蜀。楚越梁冀。懾威懷仁。奔走失氣。崛強者執服。柔從者加賜。太宗承之。眞宗成之。登封降禪。矢直砥平。巍巍乎邈三五而儔儷。彼漢魏之瑣瑣。曾何比京。夫伯益始掌火而底績茂。宋以火帝興于火墟。天之報施。豈不昭昭可推而類也哉。且夫積功以凝命而創業。因物以胙土。由土以建號。樂以反初。禮不忘其本。是故作於原廟。建之別都。三聖鼎列。大廈以居。以答景貺。以昭成功。俾子孫知厥所由。億兆仰德而不窮也。厥後烈風雲雨。電雷震曜。儆戒於下。濫炎流燒。天子忱于大異。反己正德。伏念七年。乃其有得。曰天以德訓予。而以威震予。依類託諭。予敢不信。夫政不變不足以日新。禮不修不足以化民。天之示人。若曰政禮之敝。雖祖宗之爲。猶當勿憚乎改更。於是詔三事。飭九卿。和布揆於舊政。載損載益。以承天誠。以舉聖職。夫旣天行而日白矣。乃復闕宮。獎夫神衷。三后在天。對越上穹。經之營之。不日成之。閎偉奇麗。所以使宮寢之勿踰也。清閒宵密。又鬼神之所都也。絜百圍而置楹兮。度千仞以架棟。擇一木於萬章兮。顧餘羨者猶衆。般倮饕人之儔。獻巧而林立兮。莫不心競而賈用。互長廊其如城兮。闢

重門其似洞。欒棋粲其如星兮。侏儒屹其承重。如翬斯飛。如鳥斯革兮。誠可慄其將動。闔陰房之密靜兮。雖六月其必寒。闢陽榮之敝麗兮。蓋中夜而已旦。涉廣除而徑上兮。每百盡而一級。歷青珉之瑩滑兮。曾不得而側立。顧風雨之在下兮。足以避夫燥濕。良非人力之所爲兮。宜鬼神之攸集。於是使夫設色之工。後素之巧。想象形容。圖寫必效。夫其龍顏日角。天質之顒昂兮。臣乃今知真人之異表。於是駕轡輅。登玉蚪。千乘萬騎。雲動而景附兮。想平生之豫游。旅常綰紛以絕翕兮。鐘鼓軒轟。簫管發而啁啾。雜魚龍之奇技兮。蜿蜒曼延於道周。百神紛而並迎兮。出閭闔而御夫龍舟。爾乃川后靜波。屏翳息風。舳艫相銜。若複道之延屬兮。互千里而相通。百工備官而夙設兮。棹夫謹呼而奏功。惟吉行之五十兮。餘日力而靡窮。既屆既止。威儀若初。以幸夫壽宮。乃卽前楹。以修祀事。威神如在。望之可畏。殫金玉以備用。罄飛潛以薦味。帷帳篋簟之安肆。几杖筆研之儲偪。靡一物之蓋闕兮。所以廣孝思而盡心志也。守臣侍祠。罔不勝飾。既事而旋。闕而莫覲。列仙之儒。倜傥之倫。迎神頌祇於其側。若夫祝融重黎。相土閼伯。固已喜動乎魄。情見乎色。護清蹕而晞盛德也。巍巍大哉。不可得而記已。且夫天命之不忘。人主之大寶也。祖宗之有繼。子孫之勿替也。茲聖王所以正統垂業。超商邁周。卹嗣錫羨。貽厥孫謀。使萬有千歲。得以晞風而承流也。遂作頌曰。

崇崇商丘。大火主兮。曰宋之興。道是配兮。建邦設都。以有九土兮。有皇上帝。明德輔兮。伯益之功。邈不可忘兮。三聖承承。有烈光夸。奕奕寢廟。神翺翔兮。胥千萬年。尙無疆兮。

葺所居賦并序

治平三年秋。京師大雨。涌水出。民舍多墊壞者。予所居獨完整無恙。及雨止。加葺其垣牆。因爲小賦。蹟至理之茫昧兮。同寓形于一區。任所遇之則然兮。夫孰賢而孰愚。彼每正而或禍兮。亦用拙而自如。雖背阪而向隍兮。將愈乎廣廈之宴居。歲荒落之淫雨兮。涌雖出而爲災。汨波流之罔極兮。浩溔溔而無涯。棟梁圯而弗支兮。堂壇蕩而爲溪。何昔日之高明兮。今直委而汙泥。彼攜持之與抱負兮。或耄耄之與孩。嬰念獨不保其闔廬兮。亦有朱戶之亡其閨闔。將鬼瞰之使然兮。固天理平其不平也。愧予居之僻陋兮。豈擇處而淹留。四鄰聳而逋逃兮。恨衆人之我尤。福莫大於無過兮。願舍此其何求。葺垣牆而圯墁兮。其托喻以監予。曰全生之近道兮。念無厭其所居云耳。

寫憂賦

悲四序之驟失兮。哀逝者之不復。春與秋其幾何兮。霜與露其相續。稚呱呱而旣食兮。墓積草而已宿。追音聲而在耳兮。悼容色而記目。願一見而無期兮。情可殺而逾毒。徵圖書於疑似兮。索夢魂於因想。雖可得其髣髴兮。嗟暫覲而復往。盼黃鵠之怨別兮。余猶悅其單飛。雉朝雊而泄泄兮。牧犢子感而陳詩。心鬱悒而怊悵兮。何使予懷之不夷。昔聞道於賢者兮。雖忘而未信。謂生爲勞役兮。謂死爲歸人。今吾百憂之叢中兮。旣積月而累辰。何重負之如是兮。願脫去而奚因。彼冥然而無知兮。獨甘寢於巨室。天地覆墜之不聞兮。諒絕世而愉逸。伊聖言之可徵兮。悼吾學之不競。不窺隙於未兆兮。願飲藥而加病。遂迷塗而不

反兮。非智士之能竟。排多慮而去妄兮。引至理而自鏡。雖既往之不追兮。庶來今之能定。

不寐賦

惓鬱悵其馮中兮。何鑒寐其弗夷。方永夜之未艾兮。廓靜處而長思。悼既往之弗及兮。慨來今之曷知。緒將絕而復續兮。精發越而淫移。倏四海其再撫兮。泯萬期乎須臾。武勝殷而歸周兮。天保定其千億。叔且兼乎三王兮。仰勤思而有獲。孔潛精於好學兮。致憤懣於無益。樂好善而用魯兮。孟見喜乎顏色。仁弗遇於衛頃兮。願奮飛而不得。緊視氛而見祥兮。獻肇謀乎虞虢。彼遠慮之與近思兮。智與愚皆從其職。良民生之多艱兮。嗟以心爲形役。君子有不安其命兮。小民有不度其力。非蚊虻之嚙膚兮。曾內懷於大棘。惟昔夢之遽遽兮。旣悵然而獨寤。亮伐柯之不遠兮。何內轍而架岡。歸聖人之大覺兮。繇萬世而不遇。幸曲肱而自怡兮。度無迷於初度。

鬪蟻賦

邈乾覆而坤載兮。固悠遠而無極。叢萬族於厥中兮。旣生生而息息。雖至大之可倪兮。猶至精之可識。諒擅己而自用兮。羌是非之增積。嗟子駒兮。何爲謚公字小兮。紛紛而離離。好惡利害之發兮。誰其尸之。憑怒積怨兮。交戰而在斯。何矜很之若是兮。怙勢凌弱之不移。欲一究其端而不得兮。聊索數而推之。夫其列壤分國。穴垤重襲。碩鼠之所不容兮。蟬蟬不可以徑入。豈天壤之偏隘兮。曾分土之汲汲。化飯以爲子兮。祝腐以爲民。其生孔易兮。其衆實殷。夫其子孫千億兮。固鮮愛而靡親。又豈有珠玉皮幣兮。肇乎禍亂。

之因。若是則鬪其可已。羣嬉散游。足以已矣。奪微纂寡。何足美矣。豈樹之君。而患亂甫起。抑天之有時兮。故將雨而不能自止也。嗟子兮。汝獨何誅。觀世之有鬪兮。曾何足以爾殊。襲他人之有兮。嫌己之無。妄刳於無用兮。矜多於有餘。一己之不保兮。顧有志於九區。夫豈無大人之旁觀兮。諡之陋而名之愚也。嗚呼。

秋懷賦

世量力以爲智兮。孰不自師其成心。不強短以被修兮。亦各濟其所任。蓋周任之明清兮。予嘗服於德音。性專直其似愚兮。遂底滯而廢沈。惟古人有不遇兮。亦奚慨於斯今。昔旣冠而從仕兮。冀陳力而帥職。何日月之不淹兮。疊疊至乎不惑。世與我豈其異衷兮。增余懷之默默。數廢日而倍參兮。顧自竭而安得。將奔而及事兮。愧初心而變色。譬游者之無術兮。念愈躁而愈沒。荷衆賢之并容兮。曾介善之不遺。辱與廉之末舉兮。遂以造夫攸司。君之門不可以徑入兮。旣待詔而歷時。唯褊心之狷狹兮。樂繩墨其自持。誠詭遇其猶獲兮。雖得獸而恥之。信天命之有在兮。非智勇其孰勿疑。時旣秋而涼風兮。草木落而變衰。日月麗於西廂兮。蟋蟀迅而鳴悲。閱四序之代謝兮。旣逝者之如斯。悼我心之弗獲兮。起惆悵而稱詩。

射豹賦

悲抗獨之難立兮。何有用之必害。不信孚於弗爭兮。雖忘懷其獲罪。齒恆足以自保兮。而隕奪於多輩。彼南山之珍獸。喻變化於君子。或隱霧而不食。亦胥疏而視履。猛毅資於天成。文彩蔚乎自己。伊麋鹿之強圉。與麀麀之擬擬。雖騰越其不羈。固指掌之所昧。何衆吠之狎狎兮。羌朋很而曹戾。競張目而涎吻兮。衆

遮道而覲伺。諒勇怯之不敵兮。非乃心之攸畏。忽機辟之潛發兮。遂解脰而喪精。爪牙曾不得而少用兮。貽獫狁之成名。吾固知夫皮毛之爲患兮。而黨與之足懲。嗟物類之相召兮。必機數之潛用。非明哲之周萬兮。未有不墮於衆。故曰。刳心去智。萬人不謀。和光同塵。乃與道俱。彼形譟而成光。與飾慧以矜愚。材愈大而增累。雖微末而可圖。

崆峒山賦并序

臨汝西有崆峒山。其下卽廣成澤。按莊子。黃帝聞廣成子居于崆峒之上。故往見之。莊子雖多寓言。無實。然此崆峒廣成。適皆同處。意其真有所謂廣成子者也。又大隗居具茨之山。黃帝至襄城之野而迷。皆與崆峒相近。事未必皆虛也。予因作崆峒山賦。

馳平原之曠曠兮。登隱舂之高丘。林蓁蓁而雲茂兮。樹參天以相繆。鳥哀矜而思侶兮。獸銜草而羣遊。卽崆峒之舊址兮。訪成子之所留。烏乎。服天下之爲至美兮。夫豈知聖人之緒餘。獨修身爲妙本兮。竊靜默以玄虛。何軒轅之徇齊兮。而猶特室白茅。三月而閒居。順下風而稽首兮。曾南首而晏如。彼非至人不能以下人兮。信崇高之叵娛。謂莊生之寓言兮。羌林麓其未改。瞻具茨之髣髴兮。知大隗之所在。嘗迷道於襄野兮。七聖偕而無悔。得要道於牧馬兮。稱天師而再拜。悲世俗之狹隘兮。疑至言於否甕。航污瀆之淺狹兮。僭瀛海之浮匯。守堯奧之熒燭兮。昧白日之輝耀。追古人之不可及兮。獨臨風而悲慨。彼六相之輔治兮。曷四海而弗寧。名百物而垂衣裳兮。雲門用而告成。尙紆思於荒澤兮。勉聞道於長生。豈在野之不

可蔽兮。固前修之所營。眇抽思而成章兮。庶來今而作程。

基賦

惟夫太樸之未判兮。圓方渾而無際。條物生而有象兮。適置同而立異。迨數起而滋滋兮。紛萬彙而多事。此奔基之始置器也。於是乎經緯縱橫。封畛遠邇。包穹昊之度數兮。極厚地之疆理。局有上於方罍兮。信宇宙之異此。念巧歷所不能究兮。茲古今所以甘心而不已也。咨白黑之相反兮。譬寒暑之進退。寧我盈而彼虛兮。況生殺之與成敗。智詐毅然而並用兮。莫不矜多而務大。有一言可以行之者兮。惟見幾而得先。衆蚩蚩而我隨兮。乃收功於萬全。伊昧者之弗察兮。雖服膺而拳拳。暨應變而赴敵兮。常操末而寘顛。或敗形已兆。力鬪未悟。忽焉顛仆兮。乃悔其辨之晚暮。與覆車以同軌兮。孰若易轍而遵路。或狙快小利。死生契闊。雖得雋於錙銖兮。而外勢其已奪。或決機兩陣。聞不容思。彼多算其泰然兮。既先據於便地。謂戡敵而致果兮。顧自戕而隕斃。論茲藝之微眇兮。奄衆技而首出。語之有道兮。用之有術。誠巧拙其天予兮。莫可得而齊一。貴不能得之於賤兮。又況老耆而不屈。太上貴德。服不以力。審布置以陰陽兮。謹裁度於繩墨。故撓之者無抗。詐之者必北。其次狙詐詭爲。奮其祕算。或見易而守難兮。或取近而先遠。雖僥倖而全勝兮。亦蹉跌而事反。靡精心而極意兮。每隨手而應疾。貪彼虛之可乘兮。忘己力之未實。竊冀幸於弗覲兮。故雖獲而逾失。何度量之相越兮。乃倍蓰而十百。甘受賣而無辭兮。雖三五而不敵。或騰口而攜詐兮。或匿智而叵測。或同行而習熟兮。或旁觀而少得。或乘勢而亟捷兮。或銜利而加惑。故每譬於用兵。

兮。攬廟略於籌畫。必知己而知彼兮。保常勝而有獲。

詆風穴賦

背崧右洛兮。維汝泱泱。左界韓鄭兮。前關魯陽。陵丘曼延兮。土膏脉良。生植遂茂兮。厥天且長。咨飄風兮。胡很而狂。乘冬肆威兮。怒號以常。通晝互夕兮。日月奪光。宇宙昏惑兮。顛倒玄黃。折枝排根兮。松桂毀傷。衝空動健兮。披戶登堂。獸亡其曹兮。鴻鵠失翔。問誰尸之兮。底此不祥。曰茲穴之詭異兮。竊神之機。幽嶮窮奇兮。狹中不夷。鼓舞蜚廉兮。招搖南箕。平居無事兮。淫樂而爾爲。歷九州而遐觀兮。孰樂土其若此。獨蠻夷之僻陋兮。乃自古記之矣。邈炎州之荒忽兮。汨大海其千里。上霧下潦兮。墊隘瘴癘。魑魅羣遊兮。樂人之死。蓄爲颶風兮。瘡毒疵癘。扶濤駕山兮。舟航糜毀。歷日旋時兮。然後得已。西極曠蕩兮。陰積無垠。流沙不波兮。瀚海無泉。五穀不生兮。蓬棘藜藿。熱風之來兮。天地翳昏。觸肥爲瘡兮。四肢若燔。亦幸有老駝之先知兮。嗚呼而告言歸。命野獸兮。墮焉得存。彼鬼方之幽昧兮。固宜以然。慨中土之與鄰兮。不僻不偏。胡穴神之忍兮。固蔽以頑。用夏變夷兮。至于髦蠻。外百里而不同兮。茲邑獨爲匪民。帝之高居兮。臨照在下。虎豹服仁兮。九閭莫阻。巫咸上愬兮。帝命斯許。巨靈夸娥兮。幹其絕脅。拔山投石兮。北海之濟。大野夷爽兮。八風攸弢。號令專一兮。莫予或侮。蒙常聖時兮。維民所取。穴神雖悔兮。夫孰閔汝。